

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 27. sjednici Predstavničkog doma, održanoj 10. aprila 2008. godine, i na 16. sjednici Doma naroda, održanoj 16. aprila 2008. godine, usvojila je

ZAKON
O DIREKCIJI ZA KOORDINACIJU POLICIJSKIH TIJELA I O
AGENCIJAMA ZA PODRŠKU POLICIJSKOJ STRUKTURI BOSNE
I HERCEGOVINE

SL. GLASNIK 36/08

I. OPĆE ODREDBE

Član 1.

(Djelokrug propisivanja)

(1) Ovim zakonom osnivaju se: Direkcija za koordinaciju policijskih tijela (u daljnjem tekstu: Direkcija), Agencija za forenzička ispitivanja i vještačenja, Agencija za školovanje i stručno usavršavanje kadrova i Agencija za policijsku podršku, i utvrđuje se njihova nadležnost i organizacija kao upravnih organizacija za podršku policijskoj strukturi Bosne i Hercegovine (u daljnjem tekstu: BiH).

(2) Na sva pitanja organizacije i upravljanja te druga pitanja značajna za funkcioniranje tijela uspostavljenih ovim Zakonom, kao što su: donošenje pravilnika o unutrašnjoj organizaciji i drugih propisa, upravni nadzor, odnos između institucija BiH te odnos prema pravnim i fizičkim licima, u mjeri u kojoj nisu propisana ovim Zakonom, primjenjuje se Zakon o ministarstvima i drugim organima uprave Bosne i Hercegovine, Zakon o upravi

i Zakon o policijskim službenicima Bosne i Hercegovine.

Član 2.

(Samostalnost i nepristrasnost)

(1) Tijela uspostavljena ovim Zakonom su upravne organizacije u okviru Ministarstva sigurnosti BiH s operativnom samostalnošću, osnovane radi obavljanja poslova iz svoje nadležnosti, kojima rukovode direktori i koje se finansiraju iz budžeta institucija BiH.

(2) Tijela uspostavljena ovim Zakonom samostalno će raspolagati svojim budžetom u skladu s propisima kojima se definiraju procedure i postupci finansijskog poslovanja.

(3) Tijela uspostavljena ovim Zakonom djeluju isključivo na profesionalnim osnovama, ne zastupajući, ne štiteći niti podrivajući interese bilo koje političke stranke, registrirane organizacije ili udruženja, ili bilo kojeg naroda u Bosni i Hercegovini.

Član 3.

(Sjedište i organizacija tijela uspostavljenih ovim Zakonom)

(1) Sjedište tijela uspostavljenih ovim Zakonom bit će utvrđeno odlukom Vijeća ministara BiH.

(2) Unutrašnja organizacija i sistematizacija tijela iz člana 1. stav (1) ovog zakona, u mjeri u kojoj nisu propisani ovim Zakonom, utvrđuju se pravilnicima o unutrašnjoj organizaciji i sistematizaciji koje donose direktori svakog tijela uz saglasnost Vijeća ministara BiH.

Član 4.

(Radni odnosi)

(1) Zaposleni u tijelima osnovanim ovim Zakonom su: policijski službenici, državni službenici i zaposlenici.

(2) Policijski službenici su ovlaštena službena lica na čije se radne odnose primjenjuje Zakon o policijskim službenicima Bosne i Hercegovine.

(3) Na radne odnose zaposlenih u tijelima osnovanim ovim Zakonom koji imaju status državnog službenika primjenjuje se Zakon o državnoj službi u institucijama Bosne i Hercegovine, a na ostale zaposlene primjenjuje se Zakon o radu u institucijama Bosne i Hercegovine.

(4) Radna mjesta na kojima rade policijski službenici, radna mjesta državnih službenika i ostalih zaposlenih uređuju se pravilnikom o unutrašnjoj organizaciji i sistematizaciji.

Član 5.

(Zapošljavanje)

(1) Zapošljavanje u tijelima osnovanim ovim Zakonom provodi se po postupku i procedurama propisanim zakonima iz člana 4. ovog zakona.

(2) Izuzetno, zapošljavanje iz stava (1) ovog člana može se provoditi i neposrednim preuzimanjem zaposlenih iz organa i agencija za provođenje zakona u Bosni i Hercegovini, u mjeri u kojoj se preuzimaju nadležnosti postojećih organa.

(3) Vijeće ministara BiH propisat će postupak, uslove i način preuzimanja zaposlenih iz stava (2) ovog člana.

II. DIREKCIJA ZA KOORDINACIJU POLICIJSKIH TIJELA
BiH

Član 6.

(Nadležnosti Direkcije)

(1) Poslovi iz nadležnosti Direkcije su:

a) komunikacija, saradnja i koordinacija između policijskih tijela BiH;

b) komunikacija, saradnja i koordinacija između policijskih tijela BiH s odgovarajućim organima u Bosni i Hercegovini u vezi s pitanjima policijskih poslova međunarodnog karaktera ili od međunarodnog značaja, ili u vezi s pitanjima koja su u nadležnosti Suda BiH;

c) komunikacija i saradnja s odgovarajućim stranim i međunarodnim organima u vezi s pitanjima policijskih poslova od međunarodnog značaja ili zajedničkog interesa;

d) komunikacija, saradnja i koordinacija između policijskih tijela BiH te odgovarajućih organa u Bosni i Hercegovini s odgovarajućim stranim i međunarodnim organima;

e) primjena najboljih evropskih i drugih međunarodnih praksi koje se odnose na policijska pitanja u Bosni i Hercegovini;

f) standardizacija rada u vezi s policijskim pitanjima u Bosni i Hercegovini;

g) dnevno objedinjavanje sigurnosnih informacija od značaja za Bosnu i Hercegovinu, kao i od značaja za obavljanje poslova iz nadležnosti policijskih tijela BiH, stalna saradnja s relevantnim policijskim i drugim tijelima i preduzimanje potrebnih mjera s ciljem koordinacije operativnih poslova policijskih tijela BiH, te dnevno praćenje stanja sigurnosti i obavješćavanje nadležnih policijskih i drugih tijela BiH;

h) organiziranje i provođenje fizičke i tehničke zaštite lica i objekata organa BiH i diplomatsko-konzularnih organa koji se posebno štite u skladu s odgovarajućim zakonima, međunarodnim obavezama i drugim propisima koje donosi Vijeće ministara BiH;

i) prikupljanje, praćenje, analiziranje i korištenje podataka od značaja za sigurnost Bosne i Hercegovine;

j) provođenje međunarodnih ugovora o policijskoj saradnji iz nadležnosti Direkcije;

k) ostali poslovi propisani zakonima i drugim propisima.

(2) Direkcija obrađuje podatke i vodi evidencije iz svoje nadležnosti u skladu s važećim propisima.

Član 7.

(Rukovođenje i imenovanje)

(1) Direkcijom rukovodi direktor Direkcije (u daljnjem tekstu: direktor).

(2) Direktor ima dva zamjenika koji su za svoj rad odgovorni direktoru.

(3) Direktor i zamjenici direktora ne mogu biti iz istog konstitutivnog naroda.

(4) Direktora i zamjenike direktora imenuje Vijeće ministara BiH na prijedlog ministra sigurnosti BiH, s liste kandidata koju dostavi Nezavisni odbor, na mandat od četiri godine, uz mogućnost reimenovanja u drugom narednom mandatu.

(5) Vijeće ministara BiH razrješava direktora i zamjenike direktora prema uslovima i procedurama koje provede Nezavisni odbor.

(6) Direktor i zamjenici direktora mogu biti razriješeni dužnosti prije isteka mandata:

a) na lični zahtjev;

b) ako mu je konačnom odlukom izrečena disciplinska mjera zbog učinjene teže povrede radne dužnosti;

c) ako je osuđen za krivično djelo, osim za krivično djelo iz oblasti sigurnosti saobraćaja;

d) ako se utvrdi da je aktivni član političke stranke;

e) ako se na osnovu mišljenja nadležne zdravstvene ustanove utvrdi da je trajno spriječen obavljati dužnost.

Član 8.

(Dužnosti i odgovornosti direktora)

(1) Direktor:

a) predstavlja Direkciju;

b) izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Direkcije i predlaže ih ministru sigurnosti BiH, koji ih prosljeđuje Vijeću ministara BiH na usvajanje;

c) rukovodi i usmjerava obavljanje poslova iz nadležnosti Direkcije;

d) izvještava javnost o radu iz svoje nadležnosti.

(2) Osim dužnosti i odgovornosti iz stava (1) ovog člana, direktor obavlja i druge poslove, kao što su:

a) donošenje pravilnika o unutrašnjoj organizaciji i sistematizaciji Direkcije uz saglasnost Vijeća ministara BiH, kao i drugih propisa predviđenih zakonom koji su potrebni za omogućavanje obavljanja poslova iz nadležnosti Direkcije;

b) raspoređivanje dužnosti zaposlenim u Direkciji u skladu sa zakonom, pravilnikom o unutaršnjoj organizaciji i sistematizaciji Direkcije i drugim propisima;

c) donošenje odluka o zapošljavanju, raspoređivanju i prestanku rada zaposlenih u Direkciji u skladu sa Zakonom o policijskim službenicima Bosne i Hercegovine i drugim zakonima i propisima;

d) obavljanje aktivnosti u vezi s nabavkom opreme i sredstava za potrebe Direkcije;

e) priprema i provođenje programa obuke zaposlenih u Direkciji;

f) podnošenje godišnjeg izvještaja o radu Direkcije ministru sigurnosti BiH, koji ga prosljeđuje Vijeću ministara BiH, te posebnih izvještaja prema potrebi ili na zahtjev ministra sigurnosti BiH;

g) podnošenje izvještaja Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev;

h) obavljanje drugih dužnosti propisanih zakonom i drugim propisima.

(3) Direktor je odgovoran za zakonitost rada Direkcije i za zakonito trošenje sredstava koja su joj dodijeljena.

Član 9.

(Zamjenici direktora)

Zamjenici direktora pomažu direktoru u obavljanju njegovih dužnosti, zamjenjuju direktora za vrijeme njegovog odsustva, ispunjavaju pojedine dužnosti koje im prenese direktor, te izvršavaju zaduženja koja im, prema potrebi, dodjeljuje direktor s ciljem efikasnog i pravilnog obavljanja poslova Direkcije.

Član 10.

(Spriječenost direktora)

(1) U slučaju spriječenosti direktora da izvršava svoje dužnosti i odgovornosti, izvršava ih jedan od zamjenika direktora, sve dok direktor ne bude ponovo

u mogućnosti da ih preuzme ili do imenovanja novog direktora.

(2) Ukoliko direktor ne može ponovo preuzeti svoje dužnosti i odgovornosti, Vijeće ministara BiH imenovat će novog direktora u skladu s članom 7. ovog zakona.

Član 11.

(Pružanje pomoći)

(1) Sva policijska tijela BiH, te odgovarajući organi u Bosni i Hercegovini, dužni su saradivati s Direkcijom i na njen zahtjev pružiti pomoć Direkciji u obavljanju poslova iz njene nadležnosti, u skladu sa zakonom i drugim propisima.

(2) Direkcija je dužna saradivati i pružiti pomoć tijelima iz stava (1) ovog člana na njihov zahtjev.

Član 12.

(Dužnost obavještanja nadležnog tijela)

(1) Direkcija je dužna obavijestiti nadležna tijela u Bosni i Hercegovini o saznanjima prikupljenim tokom obavljanja svojih dužnosti ako se te informacije odnose na nadležnost drugih tijela.

(2) Nadležna tijela u Bosni i Hercegovini dužna su obavijestiti Direkciju o saznanjima prikupljenim tokom obavljanja svojih dužnosti, a koja su od značaja za izvršavanje poslova i zadataka iz nadležnosti Direkcije.

Član 13.

(Povjerljive i zaštićene informacije)

(1) Između Direkcije i stranih i međunarodnih organa može se ostvarivati razmjena podataka iz nadležnosti Direkcije.

(2) Direkcija može dostaviti stranim i međunarodnim organima podatke o državljanima BiH ukoliko primi obavještenje da državljanin predstavlja opasnost za sigurnost Bosne i Hercegovine, državu u kojoj se nalazi ili širu opasnost za regionalnu ili globalnu sigurnost.

(3) Izuzetno od stava (2) ovog člana, Direkcija neće dostaviti podatke o državljanima BiH ukoliko nema razumnu garanciju da će primalac osigurati isti stepen zaštite podataka koji se osigurava u Bosni i Hercegovini.

(4) Ukoliko se podaci odnose na krivični postupak koji se vodi u Bosni i Hercegovini, razmjena podataka iz ovog člana odvija se u skladu sa Zakonom o krivičnom postupku Bosne i Hercegovine i Zakonom o zaštiti ličnih podataka.

III. AGENCIJA ZA FORENZIČKA ISPITIVANJA I VJE[TAČENJA

Član 14.

(Nadležnosti Agencije za forenzička ispitivanja i vještačenja)

(1) Agencija za forenzička ispitivanja i vještačenja nadležna je za:

- a) balistička i mehanoskopska vještačenja;
- b) hemijska i toksikološka ispitivanja;
- c) daktiloskopska vještačenja;
- d) grafološka vještačenja;
- e) biološka ispitivanja;
- f) biohemijska ispitivanja;
- g) analize DNK;
- h) specijalističke obuke;

- i) vođenje evidencije, statistika i baza podataka;
- j) vještačenje požara i eksplozija;
- k) pružanje stručne pomoći ostalim tijelima iz ovog zakona;
- l) standardizaciju rada na terenu;
- m) ostale poslove propisane zakonom i drugim propisima.

(2) Agencija za forenzička ispitivanja i vještačenja obrađuje podatke i vodi evidencije iz svoje nadležnosti u skladu s važećim propisima.

Član 15.

(Rukovođenje i imenovanje)

(1) Agencijom za forenzička ispitivanja i vještačenja rukovodi njen direktor (u daljnjem tekstu: direktor).

(2) Direktor ima zamjenika, koji je za svoj rad odgovoran direktoru.

(3) Direktora i zamjenika direktora imenuje Vijeće ministara BiH na prijedlog ministra sigurnosti BiH, u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine, na mandat od četiri godine, uz mogućnost reimenovanja u drugom narednom mandatu.

(4) Direktora i zamjenika direktora razrješava Vijeće ministara BiH.

(5) Direktor i zamjenik direktora mogu biti razriješeni dužnosti prije isteka mandata:

a) na lični zahtjev;

b) ako mu je konačnom odlukom izrečena disciplinska mjera zbog učinjene teže povrede radne dužnosti;

- c) ako je osuđen za krivično djelo, osim za krivično djelo iz oblasti sigurnosti saobraćaja;
- d) ako se utvrdi da je aktivni član političke stranke;
- e) ako se na osnovu mišljenja nadležne zdravstvene ustanove utvrdi da je trajno spriječen obavljati dužnost.

Član 16.

(Dužnosti i odgovornosti direktora)

(1) Direktor:

- a) predstavlja Agenciju za forenzička ispitivanja i vještačenja;
- b) izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Agencije za forenzička ispitivanja i vještačenja i predlaže ga ministru sigurnosti BiH, koji ga prosljeđuje Vijeću ministara BiH na usvajanje;
- c) rukovodi i usmjerava obavljanje poslova iz nadležnosti Agencije za forenzička ispitivanja i vještačenja;
- d) osigurava uspostavu centralne baze podataka iz svoje nadležnosti;
- e) razvija procedure za podršku policijskim tijelima BiH u vezi s njihovim poslovima iz oblasti kriminalističke tehnike i forenzike;
- f) osigurava saradnju sa stranim i međunarodnim organima i drugim institucijama za vještačenje i forenziku u skladu s međunarodnim ugovorima.

(2) Osim dužnosti i odgovornosti iz stava (1) ovog člana, direktor obavlja i druge poslove, kao što su:

a) donošenje pravilnika o unutrašnjoj organizaciji i sistematizaciji Agencije za forenzička ispitivanja i vještačenja, kao i drugih propisa predviđenih zakonom koji su potrebni za omogućavanje obavljanja poslova iz nadležnosti Agencije za forenzička ispitivanja i vještačenja;

b) donošenje odluka o zapošljavanju, raspoređivanju i prestanku rada zaposlenih u Agenciji za forenzička ispitivanja i vještačenja, u skladu sa Zakonom o državnoj službi u institucijama Bosne i Hercegovine i drugim zakonima i propisima;

c) obavljanje aktivnosti u vezi s nabavkom opreme i sredstava za potrebe Agencije za forenzička ispitivanja i vještačenja;

d) pripremanje i provođenje programa obuke zaposlenih u Agenciji za forenzička ispitivanja i vještačenja;

e) podnošenje godišnjeg izvještaja o radu Agencije za forenzička ispitivanja i vještačenja ministru sigurnosti BiH, koji ga prosljeđuje Vijeću ministara BiH na usvajanje, te posebne izvještaje prema potrebi ili na zahtjev ministra sigurnosti BiH;

f) podnošenje izvještaja Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev;

g) obavljanje drugih dužnosti propisanih zakonom i drugim propisima.

(3) Direktor je odgovoran za zakonitost rada Agencije za forenzička ispitivanja i vještačenja i za zakonito trošenje sredstava koja su joj dodijeljena.

Član 17.

(Zamjenik direktora)

Zamjenik direktora pomaže direktoru u rukovođenju Agencijom za forenzička ispitivanja i vještačenja,

zamjenjuje direktora za vrijeme njegovog odsustva, ispunjava dužnosti koje mu prenese direktor, te obavlja zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Agencije za forenzička ispitivanja i vještačenja.

Član 18.

(Spriječenost direktora)

(1) U slučaju spriječenosti direktora da izvršava svoje dužnosti i odgovornosti, izvršava ih zamjenik direktora, sve dok direktor ne bude ponovo u mogućnosti da ih preuzme ili do imenovanja novog direktora.

(2) Ukoliko direktor ne može ponovo preuzeti svoje dužnosti i odgovornosti, Vijeće ministara BiH imenovat će novog direktora u skladu s članom 15. ovog zakona.

IV. AGENCIJA ZA [KOLOVANJE I STRUČNO USAVR[AVANJE
KADROVA

Član 19.

**(Nadležnosti Agencije za školovanje i stručno
usavršavanje kadrova)**

(1) Agencija za školovanje i stručno usavršavanje kadrova nadležna je za:

a) razvijanje, usklađivanje i predlaganje nastavnih planova i programa obuke u skladu s potrebama policijskih tijela BiH i drugih službi te agencija iz oblasti sigurnosti;

b) organiziranje i provođenje školovanja i stručnog osposobljavanja i usavršavanja pripadnika policijskih tijela BiH i drugih službi i agencija iz oblasti sigurnosti (osnovna, specijalistička, stalna i drugi vidovi policijske obuke), uključujući:

- 1) školovanje policijskih kadrova BiH nivoa I. za potrebe sticanja čina policajac;
 - 2) školovanje policijskih kadrova BiH nivoa II. za potrebe sticanja čina mlađi inspektor;
 - 3) obuka pripadnika agencija za zaštitu lica i imovine;
 - 4) obuka pripadnika detektivskih agencija;
 - 5) stručna obuka (kursevi, seminari i sl.);
- c) razvijanje istraživačko-izdavačke djelatnosti, te doprinos ukupnom unapređenju i modernizaciji policijskog rada;
 - d) bibliotekarski poslovi;
 - e) vođenje odgovarajuće evidencije i dokumentacije iz svoje nadležnosti.

(2) Agencija za školovanje i stručno usavršavanje kadrova obrađuje podatke i vodi evidencije iz svoje nadležnosti u skladu s važećim propisima.

Član 20.

(Rukovođenje i imenovanje)

(1) Agencijom za školovanje i stručno usavršavanje kadrova rukovodi njen direktor (u daljnjem tekstu: direktor).

(2) Direktor ima zamjenika, koji je za svoj rad odgovoran direktoru.

(3) Direktora i zamjenika direktora imenuje Vijeće ministara BiH na prijedlog ministra sigurnosti BiH, u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine, na mandat od četiri godine, uz mogućnost reimenovanja u drugom narednom mandatu.

(4) Direktora i zamjenika direktora razrješava Vijeće ministara BiH.

(5) Direktor i zamjenik direktora mogu biti razriješeni dužnosti prije isteka mandata:

a) na lični zahtjev;

b) ako mu je konačnom odlukom izrečena disciplinska mjera zbog učinjene teže povrede radne dužnosti;

c) ako je osuđen za krivično djelo, osim za krivično djelo iz oblasti sigurnosti saobraćaja;

d) ako se utvrdi da je aktivni član političke stranke;

e) ako se na osnovu mišljenja nadležne zdravstvene ustanove utvrdi da je trajno spriječen obavljati dužnost.

Član 21.

(Dužnosti i odgovornosti direktora)

(1) Direktor:

a) predstavlja Agenciju za školovanje i stručno usavršavanje kadrova;

b) rukovodi i organizira rad Agencije za školovanje i stručno usavršavanje kadrova;

c) osigurava izradu i realizaciju nastavnih planova i programa;

d) osigurava stručno usavršavanje nastavnog kadra;

e) osigurava stručno, zakonito i pravovremeno izvršavanje poslova Agencije za školovanje i stručno usavršavanje kadrova;

f) priprema i izrađuje izvještaje, informacije i druge stručne materijale;

g) obavlja druge poslove u skladu sa zakonom i drugim propisima;

h) izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Agencije za školovanje i stručno usavršavanje kadrova i predlaže ga ministru sigurnosti BiH, koji ga prosljeđuje Vijeću ministara BiH na usvajanje;

i) osigurava uspostavljanje centralne baze podataka za poslove koje provodi;

j) razvija procedure za podršku policijskim tijelima BiH u vezi s njihovim poslovima iz oblasti školovanja i stručnog usavršavanja kadrova;

k) saraduje sa stranim organima i drugim institucijama za školovanje i stručno usavršavanje kadrova u okviru svoje nadležnosti.

(2) Osim dužnosti i odgovornosti iz stava (1) ovog člana, direktor obavlja i druge poslove, kao što su:

a) donošenje pravilnika o unutrašnjoj organizaciji i sistematizaciji Agencije za školovanje i stručno usavršavanje kadrova, kao i drugih propisa predviđenih zakonom koji su potrebni za obavljanje poslova iz nadležnosti Agencije za školovanje i stručno usavršavanje kadrova;

b) raspoređivanje dužnosti zaposlenim u Agenciji za školovanje i stručno usavršavanje kadrova u skladu sa zakonom, pravilnikom o unutarrašnjoj organizaciji i sistematizaciji Agencije za školovanje i stručno usavršavanje kadrova i drugim propisima;

c) donošenje odluka o zapošljavanju, raspoređivanju i prestanku rada zaposlenih u Agenciji za školovanje i stručno usavršavanje kadrova, u skladu s odgovarajućim zakonima i propisima;

d) obavljanje aktivnosti u vezi s nabavkom opreme i sredstava za potrebe Agencije za školovanje i stručno usavršavanje kadrova;

e) pripremanje i provođenje programa obuke zaposlenih u Agenciji za školovanje i stručno usavršavanje kadrova;

f) podnošenje godišnjeg izvještaja o radu Agencije za školovanje i stručno usavršavanje kadrova ministru sigurnosti BiH, koji ga prosljeđuje Vijeću ministara BiH, te posebne izvještaje prema potrebi ili na zahtjev ministra sigurnosti BiH;

g) podnošenje izvještaja Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev;

h) obavljanje drugih dužnosti propisanih zakonom i drugim propisima.

(3) Direktor je odgovoran za zakonitost rada Agencije za školovanje i stručno usavršavanje kadrova i za zakonito trošenje sredstava koja su joj dodijeljena.

Član 22.

(Zamjenik direktora)

Zamjenik direktora pomaže direktoru u rukovođenju Agencijom za školovanje i stručno usavršavanje kadrova, zamjenjuje direktora za vrijeme njegovog odsustva, izvršava pojedine dužnosti koje mu prenese direktor te obavlja zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Agencije za školovanje i stručno usavršavanje kadrova.

Član 23.

(Spriječenost direktora)

(1) U slučaju spriječenosti direktora da izvršava svoje dužnosti i odgovornosti, izvršava ih zamjenik

direktora, sve dok direktor ne bude ponovo u mogućnosti da ih preuzme ili do imenovanja novog direktora.

(2) Ukoliko direktor ne može ponovo preuzeti svoje dužnosti i odgovornosti, Vijeće ministara BiH imenovat će novog direktora u skladu s članom 20. ovog zakona.

V. AGENCIJA ZA POLICIJSKU PODRŠKU

Član 24.

(Nadležnosti Agencije za policijsku podršku)

(1) Agencija za policijsku podršku nadležna je za:

a) vođenje centralne evidencije podataka zaposlenih u policijskim tijelima BiH;

b) objedinjavanje podataka o potrebnim kadrovima u policijskim tijelima BiH;

c) pripremanje analiza, izvještaja i pregleda iz nadležnosti Agencije za policijsku podršku, za potrebe državnih organa;

d) učešće u izradi i praćenju primjene zakona i drugih propisa u vezi s policijskim tijelima BiH i davanje stručnih mišljenja vezanih za primjenu tih propisa;

e) pružanje stručne pomoći policijskim tijelima BiH u vezi sa sporovima koji se vode kod nadležnih sudova i drugih organa, ukoliko ta tijela zatraže takvu pomoć;

f) provođenje interne kontrole trošenja budžetskih sredstava;

g) vođenje zakonom propisane finansijske i materijalne evidencije za Agenciju za policijsku podršku;

h) predlaganje Vijeću ministara BiH, uz saglasnost policijskih tijela, odgovarajućih akata kojima se utvrđuje standardizirana oprema za policijska tijela BiH;

i) obavljanje i provođenje procedure nabavki za potrebe Agencije za policijsku podršku;

j) provođenje tenderske procedure za određenu opremu za policijska tijela BiH;

k) praćenje nove informacione i komunikacione tehnologije i mogućnosti njihove primjene;

l) učešće u izradi aplikativnih i sistemskih programa za različite baze podataka i održavanje baza podataka.

(2) Agencija za policijsku podršku obrađuje podatke i vodi evidencije iz svoje nadležnosti u skladu s važećim propisima.

Član 25.

(Rukovođenje i imenovanje)

(1) Agencijom za policijsku podršku rukovodi njen direktor (u daljnjem tekstu: direktor).

(2) Direktor ima zamjenika, koji je za svoj rad odgovoran direktoru.

(3) Direktora i zamjenika direktora imenuje Vijeće ministara BiH, u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine, na mandat od četiri godine, uz mogućnost reimenovanja u drugom narednom mandatu.

(4) Direktora i zamjenika direktora razrješava Vijeće ministara BiH.

(5) Direktor i zamjenik direktora mogu biti razriješeni dužnosti prije isteka mandata:

- a) na lični zahtjev;
- b) ako mu je konačnom odlukom izrečena disciplinska mjera zbog učinjene teže povrede radne dužnosti;
- c) ako je osuđen za krivično djelo, osim za krivično djelo iz oblasti sigurnosti saobraćaja;
- d) ako se utvrdi da je aktivni član političke stranke;
- e) ako se na osnovu mišljenja nadležne zdravstvene ustanove utvrdi da je trajno spriječen obavljati dužnost.

Član 26.

(Dužnosti i odgovornosti direktora)

(1) Direktor:

- a) predstavlja Agenciju za policijsku podršku;
- b) rukovodi i organizira rad Agencije za policijsku podršku;
- c) osigurava stručno, zakonito i pravovremeno obavljanje poslova Agencije za policijsku podršku;
- d) priprema i izrađuje izvještaje, informacije i druge stručne materijale;
- e) obavlja druge poslove u skladu sa zakonom i drugim propisima;
- f) izrađuje godišnji plan rada prema smjernicama i politikama koje utvrde predsjedavajući i zamjenici predsjedavajućeg Vijeća ministara BiH te nacrt godišnjeg budžeta Agencije za policijsku podršku i predlaže ga ministru sigurnosti BiH, koji ga prosljeđuje Vijeću ministara BiH na usvajanje;
- g) osigurava uspostavljanje centralne baze podataka za poslove koje provodi;

h) saraduje sa stranim organima i drugim institucijama u okviru svoje nadležnosti.

(2) Osim dužnosti i odgovornosti iz stava (1) ovog člana, direktor obavlja i druge poslove, kao što su:

a) donošenje Pravilnika o unutrašnjoj organizaciji i sistematizaciji Agencije za policijsku podršku, kao i drugih propisa predviđenih zakonom koji su potrebni za obavljanje poslova iz nadležnosti Agencije za policijsku podršku;

b) raspoređivanje dužnosti zaposlenim u Agenciji za policijsku podršku u skladu sa zakonom, Pravilnikom o unutaršnjoj organizaciji i sistematizaciji Agencije za policijsku podršku i drugim propisima;

c) donošenje odluka o zapošljavanju, raspoređivanju i prestanku rada zaposlenih u Agenciji za policijsku podršku, u skladu sa zakonima i drugim propisima;

d) pripremanje i provođenje programa obuke zaposlenih u Agenciji za policijsku podršku;

e) podnošenje godišnjeg izvještaja o radu Agencije za policijsku podršku ministru sigurnosti BiH, koji ga prosljeđuje Vijeću ministara BiH, te posebnih izvještaja prema potrebi ili na zahtjev ministra sigurnosti BiH;

f) podnošenje izvještaja Parlamentarnoj skupštini BiH, Vijeću ministara BiH i Predsjedništvu BiH, na njihov zahtjev;

g) obavljanje drugih dužnosti propisanih zakonom i drugim propisima.

(3) Direktor je odgovoran za zakonitost rada Agencije za policijsku podršku i za zakonito trošenje sredstava koja su joj dodijeljena.

Član 27.

(Zamjenik direktora)

Zamjenik direktora pomaže direktoru u obavljanju njegovih dužnosti, zamjenjuje direktora za vrijeme njegovog odsustva, ispunjava pojedine dužnosti koje mu prenese direktor te obavlja zaduženja koja mu, prema potrebi, dodjeljuje direktor s ciljem efikasnog i pravilnog obavljanja poslova Agencije za policijsku podršku.

Član 28.

(Spriječenost direktora)

(1) U slučaju spriječenosti direktora da izvršava svoje dužnosti i odgovornosti, izvršava ih zamjenik direktora, sve dok direktor ne bude ponovo u mogućnosti da ih preuzme ili do imenovanja novog direktora.

(2) Ukoliko direktor ne može ponovo preuzeti svoje dužnosti i odgovornosti, Vijeće ministara BiH imenovat će novog direktora u skladu sa članom 25. ovog zakona.

VI. PRIJELAZNE I ZAVR[NE ODREDBE

Član 29.

(Početak rada)

Vijeće ministara BiH utvrdit će početak rada tijela osnovanih ovim Zakonom.

Član 30.

(Imenovanje)

(1) Postupak imenovanja direktora i zamjenika direktora tijela osnovanih ovim Zakonom počet će 45 dana od dana stupanja na snagu ovog zakona i bit će okončan najkasnije u roku od 90 dana od dana stupanja na snagu ovog zakona.

(2) Imenovanje iz stava (1) ovog člana stupit će na snagu prvog dana početka rada tijela iz člana 1. ovog zakona.

Član 31.

(Donošenje podzakonskih akata)

(1) U roku od 30 dana od dana imenovanja direktora bit će doneseni pravilnici o unutrašnjoj organizaciji i sistematizaciji.

(2) U roku od 90 dana od dana početka rada tijela osnovanih ovim Zakonom bit će doneseni akti o provođenju utvrđeni ovim Zakonom.

Član 32.

(Postupak preuzimanja)

Direkcija će u roku od 90 dana od početka rada preuzeti poslove, objekte, sredstava za rad i zaposlene predviđene članom 6. stav (1) tačka h) ovog zakona.

Član 33.

(Usklađivanje zakona)

Svi zakoni relevantni za rad tijela koja se uspostavljaju ovim Zakonom bit će usklađeni s odredbama ovog zakona u roku od šest mjeseci od dana stupanja na snagu ovog zakona.

Član 34.

(1) Lokalni nivo, kao dio nove jedinstvene policijske strukture BiH, zatim odgovarajuća pitanja odnosa između tijela osnovanih ovim Zakonom i lokalnih policijskih tijela te ostali detalji policijske strukture bit će regulirani nakon reforme Ustava BiH, u skladu s tri principa Evropske komisije, i to u dva osnovna zakona: Zakonu o policijskoj službi Bosne i Hercegovine i Zakonu o policijskim službenicima Bosne i Hercegovine.

(2) Zakoni iz stava (1) ovog člana zasnivat će se na relevantnim odredbama Ustava BiH, a bit će

usvojeni najkasnije godinu dana nakon usvajanja Ustava BiH.

(3) Struktura jedinstvenih policijskih snaga BiH odgovarat će ustavnoj strukturi zemlje.

Član 35.

(Stupanje na snagu)

Ovaj Zakon stupa na snagu osmog dana od dana objavljivanja u "Službenom glasniku BiH".

PSBiH broj 180/08
16. aprila 2008. godine
Sarajevo

Predsjedavajući
Predstavničkog doma
Parlamentarne skupštine BiH
dr. **Milorad Živković**, s. r.

Predsjedavajući
Doma naroda
Parlamentarne skupštine BiH
Sulejman Tihić, s. r.